

Konfesando Kulpabilidad

Siudad di Los Angeles na Merka tin un servisio telefónico úniko. Por yama un number i hasi kualke konfeshon onónimo pa un minüt. Yamadanan ta drenta tur dia. “Mama, tata, ta duel mi, pero mi ta homoseksual, i nunca nunca lo mi kambia,” un hóben di 19 aña ta atmití. Un dama hóben ta divulgá ku el a okashoná un aksidente di outo ku a resultá den morto di sinku hende. “Mi ke bisa ku ta duel mi. Mi tin gana ku mi por resusitá nan.” Kada dia miles di hende ta paga pa skucha e konfeshonnan.

Tempran òf lat, nos tur ta ofendé hende di un forma òf otro. Ta apropiá pa ekspresá duele pa bo ofensanan. Ma e forma onónimo ta kompletamente kiboká. E konfeshonnan no ta dirigí na e persona korekto.

Na ken nos tin ku konfesá? Klaramente bo tin ku atmití bo ofensanan **na esun kontra ken bo a hasi piká.** Ken esei ta?

Pa di promé, debí ku TUR piká ta ofendé Dios, p’esei bo tin ku konfesá na DIOS. Dios ta kla pa pordoná: “Si nos konfesá nos pikánan, E ta fiel i hustu pa E pordoná nos nos pikánan i pa limpiá nos di tur inhustisia” (1 Juan 1:9)

No ta nesario pa konfesá serka pastor. Ta Dios—no pastor—ku bo piká a ofendé. Bo por konfesá dirèkt serka Dios pa medio di Hesus, pasobra “...ta ún Dios so tin, i ún Mediador tambe entre Dios i hende, e hende Cristo Jesus” (1 Timoteo 2:5).

Ma no ta basta pa konfesá bo ofensa na Dios. **Bo tambe tin ku atmití bo kulpabilidad na e persona(nan) ku bo a ofendé!** Nos no ke kòrda esaki. Nos ta preferá konfesá na telefon, onónimo, pa hende tende. Ma si di bèrdat bo ke drecha e daño okashoná pa bo redu, bringamentu, insulto, mentira, èts., bo tin ku atmití bo piká na e persona(nan) ku bo a ofendé (Lukas 15:18-21; 17:3-4).

Debí ku ta asina difísil pa pidi despensa òf roga umildemente pa e persona ofendé pordoná, nos ta bin ku tur klase di ekskusa.

1) Kisas bo ta argumentá, “lo mi no ofend’é asina mas, p’esei no tin nodi di laga e persona sa”. Ma bo desishon pa no hasi mas no ta resolvé e problema pa dos motibu: a) Ningun hende sa di bo desishon, i b) e desishon no ta rektifiká e pasado. Por ehèmpel, si mi gañábo un biaha—un “mentira chiki” l biaha so—i bo ta bin haña sa, maske mi semper ta papia bèrdat ku bo despues, tòg lo bo keda kòrda e mentira. Nunca bo ta lubidá ku mi ta kapas di gañábo atrobe. Mi desishon pa stòp di gaña no ta korigí e pasado. Ma si mi ta atmití na bo ku mi a gaña i pidíbo pa pordonámi, bo konfiansa pa ku mi ta restorá.

2) Of bo ta rasoná, “e ofensa a sosodé hopi tempu pasá; e persona lo a lubidá. Echu ta ku hopi biaha e ofensa no a pasa pa olvido! Si mi a hòrta fl. 10 di bo den pasado, difísilmente lo bo konfiámi. Maske ta añanan despues, e no a pasa pa olvido. E úniko manera ku bo konfiansa por ser restorá ta ora mi ta atmití na bo ku mi a hòrta i pagábo bèk.

3) Kisas bo ta haña ku “e persona no sa di e kos mes, pues pakiko bis’é. Tòg tin un dicho, ‘slapende honden niet wakker maken.’” Beibel sinembargu no ta papia di kacho ku ta drumi. Asta si e persona no sa di bo ofensa, ta opvio ku **bo konsenshi no a keda trankil**, i lo no trankilisá te ora bo ta konfesá na e persona. Ademas, bo ofensa no ta skondí pa Dios!

4) Un ekskusa popular pa no pidi despensa ta “e tin mas falta ku mi!” Esei por ta e kaso. Kisas e ta 99% kulpabel i abo tin solamente un porshento di e kulpabilidad. Ma grandura di bo kulpabilidad no ta importá, tòg bo ta kulpabel. Kon ku bo bir’é, tòg **bo ta 100% responsabel pa e ún porshento!**

Awendia, e palabra “konfesá” ta usá kasi eksklusivamente den e konteksto polisial. Ma no ta kriminalnan so ku tin ku konfesá. NOS TUR, tempran òf lat, ta ofendé otronan, i tin ku baha kabes i konfesá nos piká na Dios i esun ofendé